



Inatsisartuni ilaasortaq
Doris J. Jensen, Siumut
/Maani

Piniutit annaasat pillugit § 37 naapertorlugu apeqquteqaammut nr. 289-2019-imut akissut

Allakkat ulluat: 04-09-2019
Suliap nr.: 2019 - 18812
Akt-id: 11493627

Asasara Doris J. Jensen

Postboks 1614

3900 Nuuk

Tlf. (+299) 34 50 00

Fax (+299) 34 54 10

E-mail: pan@nanoq.gl

www.naalakkersuisut.gl

Piniutit peerneqartarnissaat pillugu ulloq 27. august 2019 Naalakkersuisunut apeqquteqarputit. Apeqqutit uannut akissassanngorlugit innersuunneqarput.

1. Imartatsinni qassusersorfiusumi qassutit inuttaminnik qaqinneqangitsoortartut annaasallu nalunaarsorumallugit kommuunit KNAPK-lu suleqatigineqarpat?

Apeqquteqaatip akissuteqarfigineqarnissaanut Aalisarnermut, Piniarnermut Nunalerinermullu Naalakkersuisoqarfimmit ilassutissat makkua piniarneqarput:

”Naalakkersuisut 2017-imi aalajangersakkanik arlalinnik atuutsitsilerput, taakkunani aalisartut aalisarnermut sakkunik qassutinillu katatanik qaqinniartarnissaannik pisussaaffilerneqarlutik. Tamanna ajornarpat, piujuartitsineq siunertaralugu aalisarnerup teknikikkut iluarsartuussivigineqarnera pillugu Namminersorlutik Oqartussat nalunaarutaat nr. 4, 30. marts 2017-imeersumi §19 aamma § 20 naapertorlugit aquttup nalunaaquttap akunnerisa 24-it iluanni Kalaallit Nunaanni Aalisarsinnaanermut Akuersissutinik Nakkutilliisoqarfik (GFLK) nalunaarfigisussaavaa.

GFLK paasissutissiivoq inatsiseqaraluartoq, aalisartut qassutit aamma sakkut katatat pillugit nalunaarutiginnittarnerat annikitsuinnaasoq.

Maannakkorpiaq qassutit annaaneqartut nalunaarsorneqartarnissaat pillugu kommuunit aamma KNAPK akornanni suleqatigiittoqanngilaq. Taamaattoq Avatangiisinut Aningaasaateqarfimmit tapersiivigineqartoq suliniut aallartinneqarpoq, tassani KNAPK-ip aalisarnermi sakkut katatat nalunaarsorneqarnissaat aamma qaqinniarneqarnissaat pillugu Sustainable Fisheries Greenland (SGF) aamma Pinngortitaleriffik suleqatigalugit. Suliniummut atatillugu kommuunit suleqatigineqarnissaat siunertaavoq.”

2. Piniutit annaasimasat qaqinniarnerni avatangiisinut anigaasaateqarfik qinnuteqarfigineqarsinnaava?

Avatangiisinut anigaasaateqarfik ukiumut ataasiarluni aningaasanik agguaasarpoq. Aalisakkanut qassutit/sakkut katatat imaluunniit qimatat aamma aalisarfinni piniariarfinnilu eqqiluisaarnissaq kiisalu plastikkinik annikillisisinissaq atoqqiinissarlu aamma biilnik atorunnaartunik eqqaaneq imaluunniit atoqqiineq pillugit suliniutinut aningaasassanik innuttaasut, suliffeqarfiit, kattuffiit aamma kommuunit qinnuteqarsinnaanerannut periarfissaq, Avatangiisinut Anigaasaateqarfiup ulloq 8. marts 2019 allagarsiissutigaa. Tassani ilaatinneqarput suliniutit innuttaasut aamma suliffeqarfiit isumalluutit eqqumaffigalugit pissusilersortarnissaannik ajornarunnaarsitsisussat, assersuutigalugu paasititsiniaanerit. Ulloq 10. juli 2019 suliniutinut qinnuteqaatit tiguneqartut tunngavigalugit suliniutinut 21-inut aningaasassanik agguaasoqarpoq, ilanngullugit suliniutit arfineq marluk, aalisakkanut qassutinut/sakkunut, aalisarfiit aamma piniariartarfiit eqqiluutsuutinnissaannut tunngassuteqarlutik.

3. Tamannalu periarfissaqarpat namminerlu piginnittup qaqissinnaajunnaarsimappagit qanoq iliortoqarsinnaanersoq, atuisunut kommuunit peqatigalugit qaammarsaassutaanissaa pilersaarutaava?

Qaqitsinissaq pillugu paasititsiniaanerit pillugit aalajangersimasunik pilersaaruteqartoqarnera Naalakkersuisut ilisimasaqarfiginngilaat.

2019-imi Upernaakkut ataatsimiinnermi atatillugu (UPA 2019/174) Inatsisartut aalajangiinerat tunngavigalugu qassutikut, bundgarnit kiisalu piniariartarfinni piniutit qimatat nunarput tamakkerlugu piarlugit salinissamut suliniuteqarnissamut pilersaarut Naalakkersuisut suliarileruttorpaat.

Aammattaaq apeqqummut 2-imut akissuteqaat innersuussutigineqarpoq.

Inussiarnersumik inuulluaqqusillunga


Karl Frederik Danielsen